

要修科儀戒律鈔卷之一

唐

三洞道士朱法滿撰

部秩鈔

夫聖人應物必資經教不立真實成濟何由  
 口吐瓊文演茲靈秘還淳反樸要此憑心就  
 學有方現於斯矣生神章曰天尊以龍漢劫  
 說洞真經赤明劫說洞玄經開皇劫說洞神  
 經此三洞尊經備明奧典隨方教化開度天  
 人能使六道歸真三乘體悟行有高下法有  
 淺深三十六部自茲彰著真藏經云一者上  
 清二者妙真三者太一四者妙林五者開化  
 六者仙人七者黃林八者上真九者道教十  
 者上鍊十一者上妙功德十二者道德此十  
 二部經蘊在大洞玉清境藏中一者洞玄二  
 者元陽三者元辰四者大劫五者上開六者  
 內音七者鍊生八者靈秘九者消魔十者無  
 量十一者按摩十二者上通此十二部經在  
 上清境藏中一者太清二者徹視三者集仙  
 四者洞淵五者內秘六者真一七者集靈八  
 者中精九者無量十者集宮十一者黃庭十

二者小劫此十二部屬太清境藏中此則三  
 洞著經列於金格七聖垂範明乎玉篇萬劫  
 一開法隨人出

太真科曰太上老君以漢安元年五月一日  
 於鶴鳴山授張道陵正一盟威之經九百三  
 十卷符圖七十卷合一千卷付授天師大洞  
 真經二十一卷授於已成真人太平經云真  
 人問曰何為天經何為地經何為人經何為  
 道經何為聖經何為賢經何為吉經何為凶  
 經何為生經何為死經神人曰然修積真道  
 道者天經也天者好生道亦好生故為天經  
 修積德者地經也地者好養德亦好養故為  
 地經修積和而好施與者為人經和氣者相  
 通往來人有財亦當相通往來故和為人經  
 也修積上古中古下古道解為道經修積上  
 古中古下古聖文為聖經修積上古中古下  
 古賢解為賢經其師吉者為吉經其師凶者  
 為凶經其師生者為生經其師死者為死經  
 也法由聖顯道寄人弘道經云侯王若能守  
 萬物將自化當知人王有道大道興隆人王

無道大道廢矣

傳經鈔

夫白羽黑翎標出代之辭金魚玉龍豈常人  
 之信可傳而不可受難見而亦難導持由器  
 宇淺深緣生羸細元始明三乘之法鏡總括  
 殊流高上開二卷之微言咸令反一本相經  
 云身者三惡之根神仙之本一名良福田二  
 名蕪黎園三名種子戶四名乘生門五名道  
 之域六名膿血村七名珍寶器八名瓦礫盆  
 九名明智室十名九夜昏人能知斯理可名  
 為真人然而有言無實不可聞經有實有言  
 乃可傳授昇玄經云末世人民有三可畏宜  
 善詳焉一者道義嫉妬可畏二者誹謗可畏  
 三者貪欲可畏道義嫉妬則經法不行誹謗  
 法師則使百姓信道不濃貪欲財色人所棄  
 薄此三者二在外一者在內除此三患乃可  
 傳道本際經云具十善願便可授之何謂十  
 善願一者願離世間穢雜境土二者願得出  
 家捨俗恩愛隨緣告乞廣建福田常行慈忍  
 永離人我三者願逢勝友引接開示四者願

值明師謚受上道五者願聞正法如說奉行  
 六者願見天尊親承聖旨七者願度一切後  
 已先人八者願以法音廣宣愚暗九者願諸  
 衆生皆發道意勸造經像修營靈觀香花燈  
 燭隨力供養令諸未悟普見法門十者願我  
 此心堅固不退具此十願乃可授之昇玄經  
 云末世欲流通靈寶內教經者有十一事信  
 著萬民爾乃可得宣傳此經一者奉戒完具  
 內無毀滅二者賑給孤老貧窮有慈愍心三  
 者勸人遠惡修善慇懃如父子四者不求名  
 譽稱毀如一五者幽隱之處勤行禮拜修諸  
 功德如處大衆六者不欺使民信之如四時  
 七者總無榮華位不加身八者捨遠妻子獨  
 處閑靜九者親近賢智博問善道十者雖在  
 幽冥不可孤心與賢者論議莫自專執十一  
 者常行謙卑恭敬於人是為十一事通內教  
 行又有十相可傳與此經一者好求勝法從  
 善如流二者好近賢智無猜疑行三者聰詰  
 賞別真偽四者謹慎言不遇行五者柔和少  
 無過惡六者能師勝已無驕慢心七者敬師

重教如貧得寶八者能奉師長不辭勤勞九  
 者已於先師有報復心十者慇懃請受晝夜  
 不懈是為十相又云或在下賤內有實德人  
 所未悉其人堪持此法者出在非意人所不  
 疑處當傳授此經玉經隱注曰受經不敬師  
 資修之亦無感而後生疾病及六畜之中太  
 平經云是其人而不傳名為開天之道其害  
 在己非人而傳之後蒙其咎定志云是其人  
 不授令人與道隔非人而趣授現世被考責  
 二明犯科夫羸行易漆妙行難遵學者如林  
 成者未一纒虧正典即結罪科女青律云受  
 道不知輕重傳非其人貪財受利取人自益  
 借物不還以為私寶天奪算一千二十四  
 律曰不得妄傳經實授與於不信泄真要訣  
 天奪算九萬六千黃籙簡文曰未合傳經而  
 妄傳考由明梵曹三被風刀揚而強傳考由  
 司正曹齋信詣師階品未合威勢怒師考由  
 四明曹不敬俯仰之格考由大儀曹受經慳  
 恪不備法信考由監天曹不關盟五帝私相  
 傳度考由司殺曹輕泄經目放露天異考由

盟天曹香燈不如法考由威靈曹不為經師  
 開度弟子三人籍師七人度師九人並考由  
 明威曹為三師建功既足年限又登而故敵  
 匪斷絕法門考由太陰曹受法之後不建善  
 功考由明都曹受法之後不廣開化度物無  
 名考由下元曹受法之後不為三師立願考  
 由明都曹受法之後不度一人抑絕賢路自  
 取功名考由幽都曹身受經法不安齋堂上  
 座斗帳香燈考由明都曹  
 明真科曰受真文各用命繒計歲餘堂有關  
 考由玄曹  
 科曰受真文用金龍三枚投於水府及山宅  
 不投三處三官拘人命籍有違考九都曹  
 科曰五帝紋繒各四十八以關五帝為告誓  
 之信有違考泉由曹  
 科曰用上金五兩以盟五嶽為實經之信有  
 違考陰官曹  
 科曰用金錢二十四萬以質二十四氣無金  
 錢銅錢亦可有違考都神曹  
 科曰香燈以開九府有違考太陰曹

科曰受經不持齋有違考太陽曹

科曰天文祕重非信不實故上聖以信效心無信則為賤道無盟則為輕實有違考左右官曹

科曰經不師受五帝無盟妄披篇目罪同竊

經之科考由明法曹已上諸條難遵易犯奉文撫卷莫不寒心端坐勿傳便為過絕始順來意十行全乖進退思量永炭交結況乃貪殘之輩鞅固為心不問前人道行唯欲弟子實有傳經不上實義何曾借問制伐既無啓齋科信寧有關盟軌則弟子既見師例後日亦學此傳不懼冥府書懲只覓名聲財利毀道敗法正由此人西昇經云迷迷以相傳輟轉相授與邪偽來入真虛無像如有自偽不別真為貪利性守非常正復忘癡盲持自欺如木自出火還復自燒腐信哉斯言幸相自屬

折傳鈔

明真科曰受真文法信當十分折二以送租師又折二散乞貧人山栖道士餘信充香燈

為弟子立功違犯考三官曹

太真科曰受天師治割配領戶不得同自化十二之折當中分其功十折五進入天師治宣示此令威使知聞如其有違五刑律論四極明科曰凡傳上清寶經受弟子信物三分散之一分投於山栖以郵窮乏之士一分供已法服一分以為弟子七祖立功投物於山栖之日當願天下窮乏之人清苦隱學並早得道度世界仙作已法服之日當願兆身與神仙同色衣冠法服得仙法則明燈檢香

當願弟子及兆之身七祖父母早離刀山三塗五苦之中昇度南宮反胎更仙事事如法剋得道真違盟負科考及兆身

科曰受上清寶經質信詣師未充科限受經之後年數應傳皆不得受他信人已皆當傳送先師備充先限然後乃得三分散之爾若違科考及七祖

明真科曰受經之身先信未備後遇賢人質信請受皆當以所受之信充備先師之限餘者可得為身法用有違考火官曹已上三處

折傳不同隨經進退今人十二折傳盡營身口上慢下暴輕脫之甚矣

年限鈔

大聖人隨劫輪轉感應道交是真乃傳非賢不授五稱符曰學道受經後四十年傳一人已延壽者四百年傳一人得地仙者四千年傳一人得天仙者四萬年傳一人得無上道者四萬劫傳一人太上靈寶大法傳授之科備矣登真隱訣曰天真授書靈人授書三千年六傳二千二百年傳十人千年五傳七百年三傳已上年限並是聖帝相師玉籍金科非代間可擬聖紀經云夫有金格玉名者則眼有日光青齒白血若上清有金書玉錄者則背誌如河魁骨前有偃骨若太極有丹簡青文者則手理有累人倒大之字方諸有玄青紫名者則眼有四規中有紫光若太清有五籍者則聲有玉音金響口方目圓若太素有金名者則白誌見於腹口中紫氣斗中有玄錄者心中有九孔肺外錦文願下有玉丸目中有綠筋眉角有上干如此之相仙真

之流出處行藏本非凡解傳授年限聽可依前今日人師促齡難保預達經教芥子投鋒得在受書盲龜遇孔若約年限恐與願違但令行以慈仁心懷至道合前十願乃可授之登真隱訣云有至學之子唯當勤心幽靈啓請玄師才分苟合必將感悟得是乘真應付之限然後乃盟盟而修修而必終吾將分金與之爲友不如此者無煩強營徒守之滿笈適足累其七祖考河之石彌增其多耳古人謂之皮好吾今號爲耳學所以開道則騰行遁寂則俱亡也夫道必須授受乃得遵修者非爲徒然如世中禁術若非傳受則用之不行舉此一言足以深悟

玄都律曰道士女官身上佩吏兵不得滾傳授他人道法若有至心精勤之人聽可若授惡逆之人三世被考自然訣曰傳授先齋三月或十日三十日二十日竟師與弟子俱登山山峯壇石上傳經弟子受經之後若便有至人丹心好道者乃齋實信求受可授不須年限竟而無其人後聽并傳其法信爲一切

作福田不得師自私自用其罪深重

明真科曰浮好三實執心不專輕忘經法穢慢靈文或傳授弟子不依科年或不關天地私傳無盟自作一法違負四盟或齋戒怠慢微忽上真其罪深重死被兇鉗循上劍樹八達交風吹樹低昂足落刀山往返無數手體爛傷痛不可忍毒不可任萬劫當得還生下愚之中或嬰六疾或盲不聽長與道隔未迷學門轉輪五苦沉淪罪因不得開度長植惡根非法傳經自招此考師實貴愛妙之道也

要修科儀戒律鈔卷之一

要修科儀戒律鈔卷之二

唐三

寫經鈔

三洞道士法滿編

夫龍章炳著鳳篆流慈紫筆題篇青林奏響浮黎國土廣度天人治鍊池中高明智炬皇人注之於曩劫青童授之於往年既開元始之章便勅帝君之筆法橋以架福岸可登抄寫書治於斯見矣本際經云若復有人紙墨綠素刻玉鐫金抄寫素治裝褫條軸流通讀誦宣布未聞當知其人已入道分名書金格列字玉篇大成云抄寫經文令人代代聰明博聞妙蹟恒值聖代當知今日明賢博達皆由書寫三洞尊經非唯來生得益及至見在獲福大成云抄寫尊經一錢已上皆得七十萬倍報萬錢已上報不可稱然捨一得於萬倍常所讚嘆何況七十四萬之倍功德巍巍富貴之家可是虛受

千具科云若寫三乘經實本寫大乘而寫中小者得五逆罪本寫小中令寫大乘者無犯

存念呪鈔